



Bentiaraq Ottosen

UKA 2023/133

Atassut

9. november 2023

Inuussutissalerinermut uumasullu nakorsaanut oqartussaaffiup tigunissaanut alloriarnissap tullia suussanersoq pillugu apeqquteqaat aallaavigalugu oqallisissiatut siunnersuut.

(Inatsisartuni ilaasortaq Aqqalu C. Jerimiassen, Atassut)

Maluginialaaqqunarpoq Atassummiit manna arlaleriarluta Inuussutissalerinermut oqartussaaffik qaqqikatsigu. Massakkorpiaq Naalagaaffinngornissamik Atassummiit sinnattuaqisuunngikkaluarluta inuiaqatigiinni aningaasaqarnikkullu siursaataasussanik sulissuteqarpugut. Taamaattorli unittooqqanerartittarpugut nikeriaqqikkusunngitsutut.

Siunnersuuteqartullu uteqqillugu Inuussutissalerinermut oqartussaaffiup tigunissaanik siunertalimmik siunnersuuteqaqqippoq ajoraluartumik siunnersuut siulleq 2019-mi siunnersuutigisimasarput Naalackersuisuniit naammassineqarsimanngimmat. Naalackersuisullu akissutaanni tamanna eqqaaneqarsimanngimmat uggornarpoq.

Nuannaarutigaaarpullu Naalackersuisut massakkut oqartussaaffinnik tigusinissamut tunngasunik suliaqarmata, atuarsinnaasagullu malillugit pilersaartoqarpassippoq. Pilersaarutilli pilersaarutaannaammata tigussaasumik aalaniartoqarnissaa tullinnguuppoq. Pingaartumillu nunatsinniit avammut niuernermut tunngasortaanut atatillugu toqqaannartumik nunanut allanut niuersinnaanissamut periarfissat ujartorluarneqartariaqarput.

Allat inuiaassutsimik oqallinniarlik, allat naalagaaffinngornissamik oqalunniarlik. Uagut Atassummiit isaasalerlugu illussap naqqaniit suliarineqarnissaa isumagissavarput. Tamattami siunertarput assigiippoq, ilaasali inernera sukataarutigigaat, uagut suliap 1-miit 10-mut tulleriiaarlugit naammassiartuaarnissaa sukataarutigissavarput.

Oqallissaarisoq Aqqalu C. Jerimiassen taperserlugu, Naalackersuisut pilersaarutit ingerlalertornissaannik oqariartuuteqarnerat tusaallugu piffissami aggersumi nakkutiginnikkumaarpugut.